




TENTAMEN PHYSIOLOGICUM

QUÆDAM DE

HALITU CUTICULARI

S I S T E N S.





Digitized by the Internet Archive
in 2020 with funding from
Wellcome Library

14

TENTAMEN PHYSIOLOGICUM
QUÆDAM DE
HALITU CUTICULARI
S I S T E N S.

QUOD
ANNUENTE SUMMO NUMINE,
Ex Auctoritate Reverendi admodum Viri,
D. GULIELMI ROBERTSON, S.S.T.P.
ACADEMIÆ EDINBURGENÆ Praefecti;

NEC NON
Amplissimi SENATUS ACADEMICI consensu,
Et nobilissimae FACULTATIS MEDICÆ decreto;
PRO GRADU DOCTORIS,
SUMMISQUE IN MEDICINA HONORIBUS AC PRIVILEGIIS
RITE ET LEGITIME CONSEQUENDIS;

Eruditorum examini subjicit

GEORGIUS CAYLEY,
PETROPOLITANUS,

Soc. Med. Reg. Edin. Soc. Extr.

Nec non

Soc. Studios. Nat. Ed. Extr.

Ad diem 24. Junii, hora locoque solitis.

*Eorum, quae confertim et celeriter nutriunt, celeres quoque
ejectiones fiunt. Hipp. Lib. ii. Aph. 18.*

EDINBURGI:
Apud BALFOUR et SMELLIE,
Academiae Typographos.

M,DCC,LXXXIX.

THEOPHILO DAVYE GARENCIERES,

A R M I G E R O,

Urbe Eboraco,

Artem Medicinae exercenti,

Cujus experientia multos annos

Probata fuit,

Ex

Fausto exitu ;

Qui

Semper eum comitatus est,

Qui,

Ob morum suavitatem

Affabilitatemque insignem,

Nec non

Humanitatem ejus immensam,

Æstimationem universalemque approbationem,

Movit ;

Ob multas curas paternas,

Maximam quoque tutelam,

Atque

Beneficia humana

Per sex annos,

Quo tempore durante,

Sub eo tyrocinia posuit,

Et cujus ab affinibus

Semper

Maximam attentionem

Expertus ;

Hocce testamentum

Grati animi :

TENTAMEN PHYSIOLOGICUM

QUÆDAM DE

HALITU CUTICULARI

S I S T E N S.

PROOEMIUM.

IN corpore humano tria organa excernentia plerumque enumerantur, meatus, scilicet, cuticulares, renes, et intestinorum canales. Horum vel omnibus vel saltem quibusdam, non solum ingesta, quibus, quo nostra nutriantur corpora, utimur, sed, progrediente tempore, partes quoque ipsae quibus corpora conficiantur,

A

semper,

semper, in naturali saltem et sana eorum conditione, foris ejiciuntur. Haec autem organa, etiamsi longe sint praecipuae, et veluti propriae corporis sentinae; attamen non omnes praebent exitus, per quos quaecunque rerum in corpus ingestarum ei supervacaneae evaserint atque inutiles, ejici possint. Pari enim fere modo, ac in insensili per cutem halitu, continuo pulmonibus exhalatur quoddam excretum fluidum, aquam referens, et forsan aliud praeterea, cujus naturam minime satis compertam habemus: Quorum utrumque, si impediat aliquid, quo minus corpore effluat, vitam ipsam certissime laederet, et, ad postremum, extingueret omnino. Quinetiam, in cavis quoque nasi et oris, fecernuntur fluida quaedam mixti generis; quae partim excrementa referunt, et partim quibusdam in corpore usibus, praesertim iis in partibus ubi ipsa fecernuntur, inserviunt. In hac Dissertatione, de iis potissimum excretionibus quae cutis sunt propriae, quaeque, propterea quod per quaedam spiramenta ibi sita transeunt, nominatae Insensilis Perspiratio fuerunt, differere mihi in animo est.

Proposito hoc consilio, multa de natura istius exhalationis quae in variis cavis corporis, veluti thorace, peritonei cavo, intestinis, textu celluloso, caeterisque quibusdam, obtinet, dicere, a re alienum videretur. Ad rem nostram fatis erit tantum observare, vaporem, hisce omnibus locis exhalatum, videri potissimum ex usu esse ad sanam ipsarum partium actionem conservandam, et minime eas lethiferas possidere qualitates, quae halitum cuticularem tam insigniter notant.

Quo quae postea dicantur, sive ad physiologiam pertineant sive ad pathologiam, facilius intelligantur clariusque, pauca de structura integumentorum humani corporis, eorumque usibus, prius dicere, quam ad reliqua pergamus, in rem fore judicavimus.

C A P. I.

De Corporis Humani Integumentis.

INTEGUMENTA humani corporis, prout, cadaveribus incisis, apparent, descripturus, minime singula de singulis enumerabo, sed praecipuas hac de re auctorum observationes, quam brevissime potero, attingere, fatisc habebō. Pergam igitur differere,

1^{mo}, De epidermidis fabrica et usu :

2^{do}, De rete mucofo; ubi fitum fit; quibus rebus constituatur; quo gaudeat colore; et cui probabiliter ufui inferviat:.

3^{tio}, De cutis verae structura, vasis, nervis, nexibus, glandibus, ductibus, inhalantibus et exhalantibus, five poris quibus perficiuntur absorptio et perspiratio :

4^{to}, De textu celluloso, structura ejus et usibus.

S E C T. I.

De Cuticula.

Cuticula five epidermis est membrana tenuis, perlucida, ficca, insensilis; nisi in palmis manuum pedumque plantis, ubi multo densior, durior, et callosior invenitur; praesertim autem in his, quo cutem sensiliorem a variis, ex pressura attrituque, injuriis, quibus, hisce in partibus, continuo obversatur, defendat. Substantia ejus, interiore superficie, maxima ex parte, aequabilis est; exteriori autem, ex infinito fere numero tenuissimarum, squamarum instar, laminarum constat: Nulla vero vascularis aut fibratae structurae signa praebet, nisi filamenta quaedam, quae interioribus eam partibus annectunt. Horum substantia filamentorum quanam sit, nondum inter anatomicos convenit; etsi Monroio, aliisque quibusdam, ea vascula esse organica structura praedita, quae ad cuticulam nutriendam accommodantur,

dantur, videatur. Cuticula, quamvis firma et densa gaudeat structura, at in aquam tamen macerata, vel vesicatoriis admotis, addensari vel extendi potest. Putrescit lentissime; sed, si causis, quae putredinem ingenerant, objiciatur, incorrupta ipsa, a jam putrescente cute fit facile separabilis. Arctissime reti mucofo adhaeret, et, quo'd hoc simul cum illa facile levare possit, quidam propterea has duas unam esse membranam existimaverunt.

Cuticula saepissime albo est colore. Aliter autem Heistero visum est. Is enim, compendio suo, hanc membranam, apud Europae incolas, albam, apud Æthiopes autem, nigram, esse affirmat. Sed alii anatomici, majore cura et tempore ad hanc rem scrutandam cognoscendamque adhibitis, colorem quo apparet cuticula, reti mucofo omnino idcirco tribuendum esse, quod, apud Europeos aequè ac Æthiopes, cuticula unum fere colorem inspectantibus exhibet, dum, apud hos, rete mucofum propius, quam apud illos, ad colorem cinereum vergere videatur, compererunt.

Totam

Totam cutis verae superficiem, nisi sub unguibus, obtegit. Pleraque quoque corporis cava intrat: Nec non meatus etiam per quos sevoſa deſluit materia, atque ductus ſpiramentorum cuticularium, intrinſecus veſtire videtur.

His rebus cognitis, uſus, quibus inſervit cuticula, ſatis apparent. Perſpicuum eſt enim, hanc membranam, veram dum obtegit cutem, eam a violentis extrinſecus injuriis defendere; et, eodem quoque tempore, ob innumera quibus perforatur ſpiramenta, aptum eſſe medium, per quod, quaecunque perſpirentur per cutem et inhalentur, expedite perfluant. Lewenhoekius auctor eſt, haec ſpiramenta eſſe in ratione quingentorum ad unamquamque ſquamam; et unam arenae particulam cujus diametros centeſimae parti digiti aequalis eſt, ducentas harum ſquamarum et quinquaginta tecturam. Ex hac ratione conſequitur, eandem hanc arenae particulam centum viginti quinque millia horum obteſturam ſpiramentorum quae perſpirationi inſerviunt.

Quod

Quod ad cuticulae originem attinet, nihil adhuc tam accuratis stabilitum fuit experimentis, ut exinde aliquod pro fatis comperto habere possimus. Eam ex expansis excernentium vasorum extremitatibus formari, Lewenhoekio visum est. Censuit autem Ruyshius, suam ex nervosis cutis papillis originem ducere. Et Heisterus, neutri assentiens, utramque simul agnoscere originem existimavit.

Morgagnius cuticulam esse cutem ipsam, sed liquore amnii et aëris pressura ita induratum, ut insensibilis omnino evaserit, ostendere conatus est. Sed quocunque fonte haec membrana derivetur, eam, quotiescunque attritu caeterisque causis intereat, brevi renasci, nemini in dubio esse potest.

S E C T.

S E C T. II.

De Rete Mucofo.

Rete mucofum, quod proximum, fubter cuticulam, jacet, eft id ftratum integumentorum, cui, ex reticuli fimilitudine, nomen Corpus Reticulatum, feu Rete Mucofum, inditum fuit. Hoc eft membrana mollis, glutinofa, feu vifcida, quæ in aquam macerata diffolvi poteft. Interftitia fibrarum, a cute ad cuticulam percurrentium, ubique implet; atque interior ejus fuperficies illi, huic autem exterior, arctiffime adhaeret. Color corporis, quem nigrum apud Afros, apud Europeos autem album, videmus, ex hac membrana, maxima ex parte, pendet. Quibus in humano corpore inferviat ufibus, eos anatomici nondum fatis compertos habuerunt. Cenfet Heifterus eam, una cum cuticula, fuppeditare fpiramenta per quæ tranfeant crines, papillæ cuticulares, et abforbentium ductus et exhalantium, quæ

proprio situ, continet. Cutis quoque papillas lubricas facit, eamque ea servat conditione, ut res externas tactu sentiat. Unde formetur rete mucosum, nondum satis cognitum est. Id ex sudore veram per cutem transmissio confici, nonnulli existimaverunt; et, hanc opinionem nonnihil eo accipere firmitatis, quod in iis praecipue partibus inveniatur, ubi acutissime sentiamus, omnibus quidem confitendum est.

S E C T. III.

De Cute Vera.

Cutis vera substantia est admodum densa et firma, atque ex fibris, quae arctissime sibi invicem annectuntur, constat. In hanc membranam, multorum extrema vasorum nervorumque tam larga diffunduntur copia, ut eam, mirum in modum, sensilem faciant. Corpus tegit universum; et fundamentum est, cui caeterae omnes partes cuticulares, quarum singulae suis funguntur muneribus, incumbunt.

Cutis

Cutis textura ubique eadem non est. Densior enim et laxior posterioribus corporis partibus, quam anterioribus, invenitur. Super palmis quoque manuum et pedum plantis, multo densiore, quam alibi corporis, textura gaudet. Superficies ejus papulis nervosis, numero fere pluribus, obrita est; praesertim iis in partibus, ubi sensus vegetissimi esse reperiuntur. Supra, rete mucoso, infra, textui celluloso, annectitur.

Glandularum quae ad cutem pertinent pleraeque, infra eam, in corpore adiposo sitae sunt; et maxima copia in naso, auribus, axillis, mammis circa papillas, et externis, quae generationi inserviunt, organis, reperiuntur. Fluidum secernunt, quod, quatenus ad colorem et spissitatem attinet, sebum vel ceram refert; eamque ab eadem, glandulae sevosae nominatae fuerunt.

Praeter vasa cutis propria, et quorum ope nutritur aliturque, duo sunt vasorum genera, quae totius ad utilitatem corporis et sanitatem spectant. Haec anatomici vasa absorbentia et exhalantia nuncupaverunt: Illa partem lymphatici systematis constituunt; haec arterialis.

terialis. De variis utriusque usibus postea dicendum erit.

S E C T. IV.

De Textu Celluloso.

Textus cellulosus, seu corpus adiposum, qui de numero integumentorum ultimus est, nunc nostram sibi attentionem vindicat. Ex plurimis membranaceis constat laminis, quae varie et inordinate inter se disponuntur, atque ea, inter quae liber patet commeatus, interstitia formant.

Hujus membranae densitas, in diversis corporis partibus, multum variat. Plerumque perlucida est, et cuti arctissime adhaeret. Musculos eorumque fibras intercedit, et membranis, quae thoracem circumvestiunt et abdomen, annectitur. Eam permulta vasa sanguifera, sed nervos vel nullos, vel saltem paucissimos, accipere, Inter omnes fere anatomicos convenit.

Cellulis

Cellulis vel cavis quae textui cellulosae connectuntur, succus unguinosus, plus minusve, prout res varient, fluidus, continetur, et hae cellulae formant substantiam corpus adiposum dictam.

Textus cellulosus, ad mollitiem, mobilitatem, et flexibilitatem vicinarum partium conservandam, maximo ex usu est. Obstat quoque, quo minus muscutorum fibrae ullo ex attritu incommodo afficiantur; et toti vestimentum corpori praebet. Quinetiam, praesidio esse adversus nocentes acrimoniae effectus, et corpori in genere, unde nutriatur, suppeditare, existimatur.

C A P II.

De Halitus Cuticularis Documentis.

ETSI, quin per cutem fit halitus, nemo dubitare potest; attamen, quo de hac re melius luculentiusque differamus, hic opus erit, quam brevissime memorare argumenta variis allata auctoribus, qui jam de iis scripserunt, quorumque experimentis staticis eam revera accidere perspicue compertum est, et, qua fluat quantitate, aestimatum.

Etiam si exhalatio et inhalatio, Hippocrate et Galeno florentibus, cognitae fuerunt; at laus tamen harum naturam propiore explorandi intuitu, Sanctorio, auctori aevi multo recentioris, debetur. Hic enim auctor primus anquirere si revera existerent, atque aestimare qua fluerent copia, et quam essent ratione, ad evacuationes

tiones quae sensiles vocantur, conando versatus est. In hoc autem parum feliciter successit; nullam enim absorptionis et inhalationis, ab extra, rationem habuisse videtur. Idem hic auctor, reconditiores quoque causas, quibus halitus per cutem augeatur, imminuatur, et impediatur, investigare aggressus est; aequae ac effectus, siue felices siue non, qui has mutationes subsequantur.

Vaporem extremo corpore semper exhalari, qui corpus circumfundit, idque, nisi aer obstet externus, grata temperie servat, atque cui a ventis dissipato subit rigor, minime quidem dubitandum est.

De Gorterius, in suis de perspiratione observationibus, ait: "Vascula tenuissima, quae, humores tenues, volatiles, exhalantes, nullam speculo polito maculam relinquentes, vehunt ad ambitum corporis, pulmones, fauces, os, et nares, exhalantia vascula dicuntur. Omnibus his ex locis continuo exhalat humor tenuissimus, insensibilis, copiosus, cujus quantitas staticis experimentis, et cujus praesentia aëre frigido condensante vapores, vel corpore frigido eos colligente, detegitur."

Van

Van Swieten, hac de re scribens, etiam notavit:
“ Totum corpus humanum perspirare Hippocrates et
“ Galenus probe jam noverant, posteaque a Sanctorio,
“ Keilio, De Gortero, Kauuio, pulchre confirmatum
“ fuit; qui per observationes, omni cum attentione
“ factas, et experimenta tentata, maximam utilitatem
“ arti medicae conciliaverunt.

“ Demonstratum jam evidentes per arterias cutaneas,
“ as, emissaria cryptularum cutanearum, ex pulmone,
“ naribus, ore, vaporem tenuem, copiosum, in aëra
“ diffusi: Tenuissimus debet esse perspirationis humor,
“ cum celeberrimus Simpson, saepius tentato experi-
“ mento, invenerit, indusium quo corpus tota nocte
“ tectum fuit, ne grano quidem ponderosius inventum
“ fuisse, licet integra libra facile tempore noctis perspi-
“ raverit e corpore. Imo in indusio, quod per tres
“ dies noctesque gestaverat continuo, nullum ponderis
“ augmentum invenit *.”

Keilius

* Vid. Simp. pag. 196.

Keilius in aphorismis suis haec habet verba: “ Per
“ omnes corporis poros, continuus facilisque aëri patet
“ ingressus et egressus.”

Hisce jam memoratis documentis, quae auctores modo dicti perspirationem insensilem revera existere probandi causa attulerunt, perpauca alia eundem in finem adjiciemus.

In primis observandum est, totum corpus unam esse massam, spiramentis plenam, propriis madefactam fluidis, et, nisi externo algeat frigore vel morbis, quoque ad nonagesimum octavum caloris gradum, thermometro Farenheitei indice, calefactum: Ideoque, ut continuo vapores emittat, omnino necesse esse. Quod hoc verum esse satis probat, est, quod, si aliquis, capite ad cutem modo raso, muro cui illuceat sol, aestiva tempestate, affideat; halitus e capite, per umbram, quae murum obscurabit, oculis perspicietur.

C

S:

* Kau. de Persp. Dict. Hippoc. No. 80.

Si nudae parti corporis corpus frigidius, et politum, veluti metallum aut vitrum, admoveatur; quod exhalat ab illa, id hujus obscurabit splendorem et inquinabit. Poculum ex vitro vel argento confectum, glacie vel frigidissima aqua impletum, corpus etsi non attingat, at brevissimo tamen tempore condensabit halitum cuticularem.

Qui medicamenta ex vivo argento et sulphure composita assumunt, ii omnes paulo post sentiunt aliquid extremo corpore exhalari. Vegetabilia praeterea quaedam, veluti allium, cepe, assafoetida, terebinthus, et forsan olea omnia aromatica, cum propriis qualitatibus nihil mutatis, per cutem transeant, uberioresque reddunt insensilem perspirationem, aliquod revera per cutem corpore eliminari, satis demonstrant.

Hoc verum esse pluribus ut probemus argumentis, nihil opus est. Nunc igitur, quo fonte oriatur halitus cuticularis, an secernatur ope glandularum, five ex arteriis exhalantibus emanet, anquirere pergamus.

C A P. III.

De Halitus Cuticularis Fonte.

IN priore hujus dissertationis parte, et eam cutis verae superficiem quae subjacenti textui celluloso annectitur, et eam cui incumbit rete Malpighianum, infinitum fere numerum eminentiarum tuberculorumve exhibere, notavimus. Has eminentias, exteriori superficie fitas, quae plerumque papillae nominantur, maxima ex parte ex nervosis filamentis constare, et vera tactus organa constituere, omnes uno ore consentiunt. Maxima abundant copia in lingua, extremis digitis, et penis glande. Harum insigniores et discretæ, quae interiori cutis superficiei, vel eam inter et corpus adiposum, insident, structurae glandularis participes esse videntur: Sed fabricam earum propriam, quae eas omnibus ab aliis discriminat, anatomici nondum satis eruerunt. Nihil aliud

aliud de iis cognitum habemus, quam quod ex iis quædam, ex arteriis convolutis, aliae autem, ex simplicibus folliculis, constituentur. Hae eminentiae, seu tubercula, ex natura fluidi quod in se continent, Sevosarum nomen Glandularum sibi affecutae sunt. Malpighius, Steno, alique eorum vestigiis insistentes, has glandulas et ad sudorem et materiam perspirabilem fecernendum destinari existimaverunt. Hanc vero opinionem adauctior provectiorque, nunc dierum, anatomiae scientia refellit omnino. Verumenimvero recentissimae accuratissimaeque hac de re observationes, nos faciunt certissimos, has eminentias, in paucissimis tantum corporis partibus, oculis percipiendas esse. Facillime quidem detegi et demonstrari possunt capite, facie, axillis, circa papillas, genitalibus utriusque sexus organis; sed vix ulla alibi parte corporis: Quum pro certissimo scimus, et insensilem perspirationem et sudorem abunde unaquaque corporis parte effluere. Hisce argumentis adducti, quidem recentiores anatomici, describere et demonstrare aliam speciem cuticularium glandularum, quibus nomen Miliarium inditum fuit, prae se tulerunt. Hae glandulae, sicut illis visum est, fuerunt, per totum
ubique

ubique corpus, vel in vel sub cute vera dispersae, et tantummodo ad sudorem et materiam perspirabilem fecernendum accommodatae. Sed, quod Ruyschio ejusque discipulis infaustum fuit, an hae revêra existant glandulae necne, nondum vel cadaveribus incisis vel institutis experimentis satis compertum est: Quam ob rem neque illis, neque doctrinis ex illis pendentibus, ulla fere, hodie, fides adhibetur. Res cum ita sit, alius quidem, unde fluat insensibilis materia perspirationis, fons, nunc nobis exquirendus est.

Arterias venasque cuti uberrime suppeditari, anatomicorum nemo ignorare potest. Subcutaneae, ut nominantur, arteriae, omnes in partes cutem inter et textum cellulosum currentes, innumeros minutos in utriusque substantiam ramulos tendunt: Partim, quo haec nutrant; et partim, quo varios deponant humores vel excernant. Arteriae subter cutem dispersae, ad postremum ita admodum tenues evadunt, ut earum cava particulas rubri sanguinis difficillime accipiant. Veruntamen, quum rubras has particulas, simul ac arteriolas intraverint, natura, et corpore sano, retro, adverso arteriolarum

olarum flumine, labi, fingere non possumus; nobis concedendum est, majores horum vasculorum truncos hic, velut alibi corporis, cum concurrentibus venis coalescere; dum minores tantum et laterales rami longius suum tendunt cursum, et ad extremum corpus, patentibus oribus, pertingunt. Proximae hae arteriae feriferae, sola, nobis iudicibus, et vera habenda sunt organa, quae ad perspirandum, et, forsan, quoque ad sudorem excernendum, accommodantur*.

Hanc de perspiratae organis materiae opinionem, res a Ruyschio ipso injectae, et, post mortem ejus, a multis anatomicis, et nostratibus et peregrinis, observantia insignissimis, firmiorem reddunt. Kauuio injicienti aliquando ita felicius opinione evenit, ut non solum vascula cuticularia, sed etiam spiramenta insensilis perspirationis, omnino impleverit. Idem quoque anatomicus, tepida aqua in arteriam axillarem injecta, eandem postea aquam, anterioris ubique brachii, erumpentem, sudoris instar, conspicatus est. Si materiam insensilis per-

* Vide Conspect. Med. Theor. § 706.

perspirationis et sudorem ex continuis vasis, et non glandularum ope, effundi concedatur, multo erit facilius explicatu, quomodo plurimae ex iis causis, quae augent perspirationem aut imminuunt, in corpus agant; et quomodo quantitas hujus excretionis, cum aetate, temperamento, ratione vivendi, alimentis, caeterisque, variet.

Haec vascula serifera, quae sua in cuticulam ora aperiant, et quae, ope microscopii, interdum cerni possunt; ab anatomicis, Exhalantium sub nomine Arteriarum, descripta fuerunt. Eorum oribus tota cuticulae superficies obfita est. In spatio cujus diametros non amplius, quam octavam digiti partem, patet, Lewenhoeckius 500 ex his spiramentis esse sita computat. Perspiratam igitur materiam in tam magna caeteris sensilibus corporis evacuationibus ratione futuram esse, minime quidem mirandum est.

Praeter spiramenta exhalantia supra memorata, inhalantium quoque species videtur esse vasorum, quae ubique in integumentis corporis affatim disponuntur. Antequam

tequam compertum fuit et demonstratum, quantum pateret systema lymphaticum, et quibusnam usui esset, anatomici putabant, inhalantia haec vascula, nulla esse alia, quam venas productiones, vel saltem absorbentes in superficie truncos; qui cum venis sanguinem rubrum vehentibus coierunt. Propterea quod in minutos venarum et lymphaticorum ramulos aliquid injicere, in primis arduum est et difficile; idcirco eorum opinionem falsam esse, nondum satis ex experimentis constat. Si vero ex harum cum aliis partium comparatione, et ex rebus circumstantibus quas satis cognitae habemus, ratiocinemur, ferent animi ut hanc conjecturam pro nihilo ducamus, et contra credamus, cum multis celeberrimis medicis, inhalantia seu absorbentia cutis vascula directe in ampliora tendere lymphatica; quae itidem in sua, sicque deinceps; donec tandem constituent ductus saccosque, qui proprie ad id pertinent systema, quod anatomici nomine lymphatici insignierunt*.

Quae

* Inhalatio ulterius probatur ex applicatione cantharidum, olei terbinthini, et quorundam aliorum; nec non in pisce Raia, Anglice vocato *skait fish*, ora absorbentium maxime evidentia.—*Monro's Comp. Anat.*

Quae supra de exhalantibus et absorbentibus cutis vasculis notata fuerunt, spectant quoque ad ea in iis sita membranis; quae interna corporis cava, veluti bronchia, fauces, nares, tractum intestinale, cava peritonei, pleura, pericardium, et cellulas innumeras in celluloso, totum per corpus, textu collocatas, abducunt.

D

C A P.

C A P. IV.

De Mutationibus ejus quod ad quantitatem.

Hoc in loco pauca de variis, quod ad quantitatem, mutationibus, quas, ob causas postea memorandas, insensilis perspiratio subit, observanda sunt. Sed, ut prius ad amissum diceremus, qua quantitate, in sana corporis conditione, effluat, quibusdam necessarium esse videatur. Hoc autem, ob varias quae accidunt res, factum difficillimum est; et eo magis, quod halitum ex pulmonibus, una cum inhalatione ab extra, nemo adhuc rite ad trutinam ponderatum habuit. Quibus rebus cognitis, animoque volutis, quantitatem, qua emanet perspirata materia, aestimare, in primis arduum esse, magnopere quidem nemini mirandum erit. Res etsi ita sit, at hoc tamen pro fatis certo scimus, quantitatem, scilicet, perspirati vaporis inversa urinae quantita-

tis ratione variare. Quoniam nihil de hac re novi, proprio ex penu, prompturi simus, liceat nobis memorare quantitates, definitis temporibus perspiratas, et aestimatas secundum eorum summam experimentorum, quae Sanctorius aliique auctores, sua quisque patria, in hunc finem summa cura instituerunt.

In hac parte rei nostrae tractanda, enumerandae sunt,

Primo, Causae quae insensilem perspirationem adaugent ; dein,

Secundo, Quae imminuunt eam aut impediunt.

S E C T. I.

De causis quae insensilem perspirationem adaugent.

P A R S I.

De rebus extrinsecus corpori admotis quae hunc producunt effectum.

Causarum

Causarum quibus augetur halitus cuticularis nihil calore magis pollet. Caloris gradus diversis ex causis pendet; nimirum, coeli temperie; calore corpori ope ignis admoto; vel spontaneo corporis calore, nimis vestibus, vel fomentis callidis admotis, coacervato.

Atmosphaerae calorem in diversis orbis terrarum regionibus multum variare, omnibus optime notum est. Quo propius circulo aequinoctiali regio adjacet, vel quo minus super planum mare sita sit, eo, caeteris paribus, vapor circum eam ambiens calidior invenitur. Hinc facile reddi potest ratio istius, in quantitate perspirationis, varietatis; quam Sanctorius in Italia, De Gorterius in Batavia, et in Britannia Keilius, observaverunt. Horum philosophorum primus, sexaginta in dies uncias, vel quinque ex octo ingestis partes, corpore per halitum cuticularem, in Italia, effugere, comperit. Enarrat secundus, perspiratam materiam rarissime, in Batavia, quadraginta sex unciis minorem esse, aut sex et quinquaginta excedere. In Britannia, secundum proximi experimenta, a triginta una indies unciis, ad unam unciam et quadraginta, variat.

Ex his jam dictis rationibus, perspirationem, in regionibus sub curru propinquioris solis, abundantiorē esse atque uberiorē, quam frigidioribus in terris propius vertici Septentrionali adjacentibus, satis constat. Sed hic quoque observandum est, calorem, quovis modo corpori applicatum, halitus per cutem quantitatem augere, et interdum etiam movere sudorem. Causas inter externas, quae calorem corporis adaugent, enumeranda sunt; callida cubicula et vestimenta; balnea tepida; fomenta; vapores herbarum virtutibus imbuti. Calor, hoc modo corpori admotus, laxiorem facit cutem; spiramenta recludit; eodem quoque tempore, totum corpus stimulat; intendit impetum et velocitatem sanguinis; molem expandit fluidorum; et hoc modo perspirabilis quantitatem humoris, ad postremum, auget.

P A R S II.

De rebus intrinsecus corpori applicatis quae insensilem perspirationem augent.

Ad

Ad hoc genus medicamentorum pertinent, diluentia, stimulantia, sedantia, emollientia, emetica, et nauseam facientia. Haec, vel singulatim vel conjunctim, certis dosibus in corpus assumpta, halitum per cutem copiosorem reddunt, et, quantitate adaucta, movent sudorem.

Si omnia, quae Materia Medica continet, medicamenta enumerarem, quae insensilem perspirationem adaugent, ideoque Diaphoretica nominantur, vereor ne nimius in hoc genere viderer. Ad rem meam satis erit observare, omnia hujus generis medicamenta, maxima ex parte, in sanguiferum systema agere; quum, iis adhibitis, cordem et arterias excitari et stimulari pro certo sciamus. Quaedam sunt autem ad hoc genus pertinentia, quae in solum ventriculum agunt; indeque, ob mirum consensum hoc organum inter et extremum corpus, extremas in cutem arterias, eamque ob rem, perspirationem, adaugent.

Quomodo unumquodque ex diaphoreticis medicamentis in corpus agat exponere, hac in dissertatione,

non

non aggrediemur ; fatis ad rem nostram habentes, si finem ad quem omnia tendunt percipiamus. Diaphoretica, in genere, cordem et arterias stimulant et excitant ; musculares ventriculi fibras firmiores reddunt. Et ventriculus, novum inde vigorem adeptus, vim extremis in cute arteriis impertit, eamque ob causam insensilem perspirationem reddit uberiores. Quaedam sunt quoque hujusmodi medicamenta, quae in massam sanguinis accepta, molem ejus augendo, indeque vasa sanguifera stimulando, plurimum ad augendum halitum cuticularem pollent. Sed quomodo, dicat aliquis, medicamenta, quae, quod ad eorum et naturas et vires attinet, diversa inter se et prorsus contraria videntur, cujusmodi sunt ea quae stimulant et sedant, eundem effectum edere possunt ?

De quae sedant medicamentis, roganti responderi potest : Hujusmodi, medicamenta in corpus ingesta, initio sensilitatem nervosae ventriculi tunicae directe sive indirecte obtundere ; et caeterarum quoque partium, mirandum propter consensum eas inter et ventriculum, sensilitatem hebetare : Partes, quas proxime post ventriculum

triculum afficiant, probabiliffime cordem effe et arterias ; per quae fanguis, his medicamentis adhibitis, lentius et minuto impetu curfum peragit : Velocitate fanguinis impetuque imminutis, extremas arterias inde laxiores reddi ; et, eam ob rem, fanguinem, extremo corpore relicto, ad receptaculum ejus, cordem, reflueret : Tandem vero cordem, ob nimium fanguinem in eo accumulatum, ftimulari, et fanguinem in extremas arterias redintegrato adauctoque impetu propellere : Extremas arterias antea infirmatas et laxatas, nunc, eam ob rem, fanguini infuperabili fere impetu profluenti minus obfiftere poffe : Et denique, prout impetus et velocitas fanguinis per cordem et arterias plus minusve aucta fuerint ; vel infenfibilem perfpirationem reddi uberiores, vel fudorem toto ex corpore erumpere. Medicamenta, e contrario, quae ad genus ftimulantium proprie pertinent, in corpus directe augendo, vitales actiones et animales, agunt. Sed utcunque res ftimulantes a rebus fedantibus, modo agendi, abhorreant ; at medicamenta tamen utriusque generis, conjunctim, haud femel felici cum fucceffu adhibita fuerunt : Quod idem de emeticis cum opio conjunctis, velut in pulvere Doveri, dici poffit.

P A R S III.

De frigoris in corpus actione pauca, hoc in loco, dicenda sunt; utpote quod, nimium ni sit, halitum cuticularem aequè, ac calor ipse, copiosorem faciat. Calor autem et frigus, inter se comparata, hoc habent diverſi; quod illius effectus longius permaneant; dum effectus hujus multo breviores ſint atque fugaciores. Praeterea, effectus frigoris multum ex ſtatu corporis pendent: Hominibus enim robuſtis corporibus, exercitatione, ni adſit humiditas, abundantior perſpirationo, in frigide, quam mitiore, tempeſtate induci poteſt.

Frigus, ex effectibus quos in corpus humanum praefat, vel inter ea medicamenta quae totum corpus, vel ea quae tantum corporis partem, ſtimulant, collocare liceat. Univerſum corpus ſtimulare ex eo apparet, quod brevi corpori admotum, cordem et arterias ad agendum incitat, novumque ſyſtemati impertit vigo-

E

rem.

rem. Exinde fit ut, corpus in balneum frigidum subito immergere, efficacissimum, quibusdam in morbis, remedium habeatur. Praeter effectus modo dictos, hoc cibi appetentiam acuit; firmiores reddit fibras musculares; et halitum auget cuticularem.

Frigus pro locali stimulo habeatur, quoties interno corpori, five in pulmones inter perspirandum forma frigidi aëris, five in ventriculum forma frigidae aquae, assumptum, admoveatur. Utrisque enim casibus stimulat eas tantum partes, quas contingit; dein indirecte extremos arteriarum ramulos, per nervorum consensum, incitans, halitum cuticularem magis profluentem facit.

Ægrotis, ut frigidam aquam biberent causa sudorem movendi, praecipere, Galeno, iisque ejus vestigiis insistentibus, mos fuit minime infrequens. Celeberrimus quoque Cullenus, in opere de Materia Medica nuperissime edito, ait: “ Cold water taken into the stomach is
“ a powerful means of exciting the action of the ex-
“ treme vessels; and, with the assistance of covering
“ the

“ the body very closely, it may be employed for ex-
“ citing sweat.”

Frigus vero tum plurimum pollet ad augendam insensilem perspirationem, cum sanguis suos circuitus salutari velocitate et vigore peragit, et corpus modico exercitio utitur. Exercitatione igitur, cis lassitudinem et sudorem, prius uti, quam in balneum frigidum descendatur, minime unquam negligendum est *.

Hic loci frictio, quae inter diaphoretica stimulantia externa enumerantur, nobis opportune obvenit notanda. Quum vero eam inter et alia stimulantia, quae, corpori externe applicata, perspirationem augent, plane nihil intersit; multa de ea dicere, inutile esset et infructuosum. Eodem modo, ac calor externus, in corpus agit, incitando scilicet extremas arterias et eliciendo perspirationem; dum, eodem tempore, universum corpus parum afficit. Si stimulantia sint ulla, quae, in corpus quovis modo assumpta, hoc modo agunt; ut ita
agant

* Vid. Gregor. Conspect. Theoret. Medicin. vol. 2. § 1209.

agant per nervorum consensum inter extremum corpus et partem internam cui admota fuerint, omnino, ut antea dictum, necesse est.

Exercitatio quoque, locum inter causas externas quae halitum cuticularem profusorem reddunt, jure asserit. Ad hunc finem, nimia si non sit, et toti corpori debilitatem inducendo circuitum sanguinis languidiorem non faciat; in primis, propter firmitatem et vigorem quae totum corpus exinde assequitur, tuta et accommodata reperietur.

Electricum fluidum ab omnibus scriptoribus in diaphoreticorum ordine collocatur. Illic sibi locum jure vindicat: Cordem enim stimulat atque arterias; et horum ope, fugato sanguine ad extremum corpus, solito abundantior elicitur perspiratio.

Hoc in loco animadvertendum est, praeter vim seu energiam nervorum, qua circuitus sanguinis multum afficitur, alias esse causas quae impetum ejus et velocitatem augent, eamque ob causam halitum cuticularem,

Causae

Causae ad hoc genus pertinentes, inter eas quaerendae sunt vires, quae directe in nervos agere existimantur. Hujusmodi virium sunt omnes, qui incitant, animi affectus et motus: Qui, secundum omnium opinionem, in systema sanguiferum agunt; et, eam ob causam, in diaphoreticorum ordine fuerunt collocati.

Ætas quoque corporisque habitus, inter ea enumerantur quae aliquem in quantitatem halitus cuticularis effectum habent. Sanguis citius cursum suum in infantibus, quam hominibus adultis; et in adultis citius, quam in iis provectiore aetate. Exinde fit, ut, quo propius ad senectutem progredimur, eo parcior fuerit insensibilis perspiratio.

Homines robusto et sanguineo temperamento, quam ii laxo et phlegmatico; virilis, quam muliebris sexus; qui lautiore, quam qui tenuiore diaeta, vescuntur; qui, maxima ex parte, carne aluntur, quam qui vegetabilibus; uberius perspirant. Ex vegetabilibus, allium, cepe, et acida, fere inter ea referuntur medicamenta, quae halitum cuticularem movent.

SECT.

S E C T. II.

Nunc pauca de iis dicenda sunt, quae insensibilem perspirationem imminuant.

Frigus, sub quibusdam rebus circumstantibus, ut antea dictum est, perspirationem adauget. Sed, rebus aliis alias se habentibus, effectus huic omnino contrarios praestat. Frigus cum madore corpori debilitato admotum, pro intensitatis ratione, perspirationem parciolem facit, aut prorsus fere obstruit. Idem fit robustis, si modo corpus eorum diu algori, aëre simul pluvioso, fuerit expositum. Non solum frigus cum humiditate, sed quoque siccitate nimia conjunctum, ut in Canada et Greenlandia est videre, eosdem effectus interdum edit.

Variae atmosphaerae nec non corporis humanae conditiones, quibus huic effluxui obstititur, a Sanctorio referuntur; qualis est aër sub noctu et humidus, isque
praecipue

praecipue qui mari incumbit. Super mare coelum, ut enuit, simul cibo crasso, concoctu difficili et perspiratu, adjectum, cachexias gignit; et Celsus monuit, spissat corpus sanum Aquilo.

Corpus exercitio vehementi, ceu saltatione, cursu, poculis, thermis, calefactum, perspirationi supprimendae magis obnoxiosum evadit.

Sedere madidis vestimentis amictus, humidis lectis cubare, vel diu humiditate alio quovis modo exponi, ad perspirationem impediendam plurimum pollere omnibus innotescit.

Prave concoquere, nimis longum a cibo abstinere, plantis succulentis, maxima ex parte, vesci, utpote quae totum corpus infirmant, inter ea habenda sunt, quae perspirationem cuticularem impediunt.

Deprimentes quoque affectus motusque animi, insensibilem perspirationem imminuunt. Quo modo in corpus agant, facile intelligitur; omnes enim suos effectus,
vim

vim nervosam minuendo, praestant. Exinde fit ut impetum sanguinis, et, eam ob causam, halitum cuticularum, imminuant.

Memoratis omnibus quae ad hanc partem rei nostrae attinere videntur; tantum unum hoc amplius adjiciam; quod, multis in corporis conditionibus, ubi per quasdam causas, sed praesertim per nimiam cibi abstinentiam, vel deprimentes animi affectus, imminuitur vel obsistitur perspiratio; absorptio seu inhalatio ab aëre externo augeatur.

C A P. V.

De Perspirationis Ufu.

Dictis supra rite cognitis et perpenſis, difficile aut arduum eſſe minime reperietur, varia narrare munera; quæ, humano in corpore, naturalis hæc evacuatio perficit. In hac vero diſſertatiuncula, præcipua tantum enumerabo.

I. Humorem in ſpiramentis cuticularibus, antequam excernatur, plurimum, ad corporis integumenta humida et mollia conſervanda, conferre, quam maxime probabile eſſe videtur. Inde fit, ut rebus affici externis ſerventur aptiora. Eadem de cauſa, nervosæ papillæ, in hoc liquore quaſi madefactæ, filamentis ab extra-impreſſiones accuratius promptiusque demandant, hæſque per ea ad cerebrum uſque propagant.

F

Hinc

Hinc in omni perfectiore sensus organo delicatioreque, ut membranae id circumvestientes, molles et flexiles fluido quodam sibi apto et proprio fervarentur, natura consultrice et provida utilitatum satis provisum est. In ore saliva; in naribus mucus; in auribus serosa materia sibi propria; in oculis lachrymae et idoneum smegma, hoc munere funguntur. Atque probabile est, totam superficiem corporis, et praesertim extremos digitos, rebus extrinsecus admotis, multo affici aptiora esse, ob cuticularem halitum qui ea continuo humectat.

II. Halitus per cutim, plurimum quoque pollet ad eam fluidorum corporis et solidorum rationem conservandam; in qua prospera valetudo ponenda est, et cujus conturbatione vita ipsa torpesceret, et tandem interiret omnino. Hinc, quibusdam in casibus, ratio expellendi minore, quam aliter fieri posset, periculo, morbosos serosos humores, qui in circumfluo sanguine nimia accumuluntur quantitate, nobis suppeditatur.

III. Cibi et potus quibus vescimur, parva tantum pars ad nostra nutrienda corpora pertinet; dum multo major pars, utpote supervacanea et inutilis, per varios meatus supra dictos ejicitur. Spissiores partes hujus recrementi et solidiores, per alvum ejiciuntur; rariores autem liquidioresque per meatus uriniferos, spiramenta cuticularia, et pulmones, corpore effugiunt. Sic insensibilis per cutim halitus, cum aliis multis excretionibus, ad omnia supervacua excrementa evacuandum ex corpore, conspirat. Quinetiam, per hos meatus, non solum superfluae partes cibi et potus corpore efferuntur, sed etiam inutiles quaedam et effoetae partes corporis ipsius. In perspirabili materia, aequè ac in urina, semper reperitur copia salinae materiae, una cum multis foetidis et odoratis particulis; quae, in diversis animantium speciebus, et in singulis speciei ejusdem, multum inter se differunt. Fixus quoque aër, secundum quaedam experimenta nuper instituta, cum halitu cuticulari et pulmonario, haud parva quantitatè, miscetur. Et, denique, quidam putaverunt medici, per cutim transire multum putridi vel putrescentis fluidi, quod antea in sanguine, ob vehementiorem calorem, velociorem sanguinis

guinis circuitum, vel ob alias causas parum cognitae, ingeneratum fuerat.

IV. Ex utilibus et accuratis experimentis, quae Doctor Fordycius in calefactis cubiculis instituit, fatis constat, corpora animantium, in quibusdam occasionibus, potentiam generandi frigus, vel sese in frigidiori temperie, quam circumfluit aër, fervandi possidere. Miram hanc potentiam evaporationi quidam philosophorum attribuerunt. Professor noster celeberrimus, hac de re, scribens, haec habet verba: “ Non est dubi-
“ tandum, vaporationem tum e cute, sed multo magis
“ ab ipso pulmone, calorem corporis, qua ratione cum-
“ que is genitus fuerit, temperare multum. Neque in-
“ credibile est, hanc vaporationem aliquanto calorem
“ respirando genitum, plus quam compensare, et corpus
“ itaque revera frigidius reddere.” Hinc igitur alter perspirationis usus apparet. Quidem confitendum est, illum perspicacissimum chemicum et medicum Adair-
rem Crawfordium, nuper, ex serie experimentorum, quae summa cura et diligentia fecit, inductum fuisse ut attribueret hanc obfistendi nimiae coacervationi caloris
potestatem,

potestatem, quam pleraque animalium, si non omnia, natura possident, aliae causae eam quadantenus referenti, qua calor gignatur. Nihilominus autem candide confitetur, insensilem perspirationem, ad eundem effectum producendum, multum pollere. Absorptionem caloris, vel frigoris generationem, consequi vaporationem fluidorum in genere, per multa experimenta, ea praefertim primo a Doctore Culleno, hac de re, instituta, abunde apparet. Cum igitur halitus cuticularis revera est species vaporationis, plus minusve frigoris, halitu sese in aëra diffundente, generandum esse, perspicuum est. Ad hoc, res si ita sit, generati caloris quantitatem, quantitati humoris per cutim, eodem tempore, perspirati, in definita quadam ratione futuram esse, nemini in dubio esse potest. Satis igitur patet, quo magis corpus calefiat, exindeque insensilis perspiratio augeatur, eo plus caloris vaporans fluidum absorpturum esse, et corpore abstracturum. Haec opinio de usu perspirationis, plurimum firmitatis ab acutissimo sagacissimoque naturae rerum indagatore, Doctore Franklino, accepit. Celeberrimus hic philosophus, in tractatibus quibusdam philosophicis, quos, multis abhinc annis, edit,

dit, narrat ; die quodam, cum thermometrum sub umbra situm, centesimum caloris gradum indicabat, calorem sui corporis minime ad insolitum gradum adauctum esse ; veruntamen, prae suo corpore, unumquodque quod tractaverit, percalidum, aequae ac si, per aliquod tempus, igni admotum fuisset, sensum esse.

Hoc evaporationi, verae velut causae, tribuendum esse, eruditissimo Doctore visum est. Physiologi igitur, unum esse ex usibus insensibilis perspirationis praecipuis, quod corpus in idonea temperie fervet, rectissime docuerunt.

C A P. VI.

De morbis quibusdam qui ex halitu cuticulari suppresso vel minuto oriantur.

INSENSILI per cutim halitu deficiente vel suppresso, ingens morborum cohors humanum corpus affligere observatur. Si suppressio aliquandiu manserit, totum corpus solito fit plenius, hebescit languescitque; atque, nisi materia halitus cuticularis morbide retenta, interim, per quaedam ex caeteris organis fecernentibus, secreta fuerit, et ex corpore, per aliud iter, quam per cutim, effluxerit; animus moerore, tristitia, solitudineque, dies atque noctes, exeditur: “Hilaritas, dum libera per
“ corporis superficiem perspiratio fit, in mente nasci-
“ tur; sed contra, gravitatis in corpore sensus, et in
“ animo moestitia, perspiratione impedita, percipitur*.”

Insensilem

* Vide Sanctor. Aphor.

Insensilem per cutim halitum, vel supprimi, vel deficere, plerumque ex statu cutis ipso cognosci potest. Corporis enim, sanum si sit, extrema superficies, semper plus est minusve tactui humida, mollis, et unctiuscula; sed, halitu cuticulari suppresso, aegrotus crebro rigoribus et horripilatione afficitur; et cutis, siue frigida siue calida, sicca est tangenti et dura. Prorsus ita cutim plerumque sese habere, iis ineuntibus morbis qui ad genus phlogisticum pertinent; unicuique, qui unquam fuerit catarrho affectus, ex propria experientia notum est.

Nunc insignioribus ex morbis, qui, ex insensili perspiratione, vel frigore vel aliis quibusdam causis suppressa, maxime originem ducere videntur pauci, hoc in loco, enumerandi sunt.

Febris.—Inter causas quae febres continuas inducunt, frigus, cum humore conjunctum, Cullenus celeberrimus recensuit. Quomodo haec agunt, ex sequentibus Doctoris Homii verbis intelligere possumus: “Frigus,” ait is auctor, “humidum valetudini plus infestum est,
“quam

“ quam ficcum, quia perspiratio magis impeditur.” Febris naturam et veram causam, quanquam adhuc adeo parum cognitas habemus, ut, quomodo ex halitu cuticulari impedito oriatur, pro certo affirmare non possumus; at eam tamen revera talem agnoscere causam, adeo est compertum, ut, qui neget, omnino fere nullus inveniatur.

Phlegmasiae.—Multo major quoque numerus generum, quae ad hunc morborum ordinem pertinent, impeditam vel repressam perspirationem, suas inter causas, agnoscit. Hoc accidere videtur, non solum, ob materiam quae per cutim exhalari debet retentam, sed quoque potissimum, ob humores, qui expedite ad extremum corpus fluere solebant, inde repressos, et retro, interiores in partes corporis, missos: Unde magnae irritationes, et sanguinis in visceribus congestiones, consequuntur. Sanguis, hoc modo, et hanc ob causam, cumulatus, diversos effectus diversis in organis, pro diversitate rerum circumstantium, quae causas perspirationem impediennes comitentur, et pro conditione organorum in quae sanguis, ab extremo corpore fugatus, repellatur, praestabit.

praeftabit. De partibus quae affici funt caeteris aptiores, obfervare in genere nobis liceat, eas, quas morbus jam debiliores laxioresque reddiderit, generali quavis caufa affici proniores effe, quam quae fanae incolumesque maneant.

Inde fit, ut quaedam partes eadem inflammatione iterum iterumque affectae, miram in eam proclivitatem, ex confuetudine, concipiant; velut *Anginam Fauces*, et *Pneumoniam Pulmones*. Ad hoc, halitus cuticularis fuppreffus vel imminutus, caufa morborum foecundiffima, potiffimum has corporis partes, quae, etiamfi ab omni adhuc morbo vacuae fuerint, tamen natura, et quafi ex haereditate, imperfectae funt et infirmae, afficit. Sic in

Haemorrhagiis, fanguis ab extremo corpore, in organum male natura conformatum, nimia copia, miffus, faepe vafa ejus fanguifera in actionem adeo vehementem et inordinatam incitat, ut vel anafomofi dehifcant, vel rumpantur; et fanguis ex foraminibus effufe profluat. Hoc modo, impedita perfpiratio, faepe *Haemoptysin*,

typh, et haud raram ejus comitem, *phthisin*, scilicet pulmoneam, inducit. Imminutio excretionis cuticularis, diu si urgeat, saepe plenitudinem totius corporis, et, praeterea, interdum haemorrhoidem, iis in partibus ad hunc morbum proclivioribus, efficit.

Profluvia.—Frigus ita corpori admotum ut catarrhum inducat, imminuendo cuticularem halitum, ideoque perspirabilem materiam, ab extremo corpore, ad mucosam membranam narium, faucium, bronchiorumque, avertendo, agere videtur. Mira, ut supra memoravimus, halitui pulmoneo, cum eo per cutim, ratio existit; quam ob rem, alterutro quavis ratione adaucto, eadem imminuitur alter. Exinde intellectu facile est, quo modo insensilis perspiratio, vel impedita vel suppressa, sanguinis ad pulmones affluxum augeat, ideoque catarrhum inducat. Sed quoque veri simile est, humorem, qui, corpore sano, per cutim exhalatur, solito acriorem, diu in corpore retentus si fuerit, evadere; et ad glandulas mucosas derivatum, ibi quandam irritationem, et non-nihil quoque inflammationis, ut in catarrho saepe videre est, excitare posse.

An dysenteria unquam ulla alia ex causa, quam speciali vel sui generis contagione, oriatur, necne, nondum a Physiologis consentitur. Sed haec res utcunque sit, tamen ex variis consimilibus documentis, frigus cum humore conjunctum, quod, extremo corpori admotum, infensilem per cutim halitum impedit, homines multo contagioni dysentericae obnoxiores facere, nobis concludere liceat.

Ad eandem causam, perspirationem, scilicet, impeditam vel omnino suppressam, adauctae quaedam aliae excretiones, veluti urinae alvique, referendae sunt. Halitu enim cuticulari imminuto, urina, profluere solito copiosior, fere semper observatur. Hoc autem, quoniam ex aquosis humoribus ad renes adaucta quantitate derivatis, et fortasse ex quibusdam acris salinisque particulis haec organa incitantibus, pendere videtur, raro pro morbo habendum est, neque fere unquam ope medicorum egebit.

Interdum, veruntamen, accidit morbidus urinae fluxus, *Diabetes* nominatus; cujus suppressam perspirationem

nem plerumque in causa esse, a plerisque dictum fuit medicis. Praesente hoc morbo, cutis, revera, modo admodum peculiari afficitur. Namque non solum cuticularis halitus imminui, sed, eodem quoque tempore, cuticularis absorptio augeri, videtur. Hoc proxime memoratum ita esse, complura experimenta a Clinicis Medicis, cognoscendi causa, Nosocomio Edinburgo, ex industria instituta, multo probabilius reddunt. Corporibus quorundam ex aegrotis diabete laborantibus suavi oleo inunctis, urinae exinde, in quibusdam saltem casibus, secretio fluxusque, multum imminuta fuerunt.

Diarrhoeam quoque, per saepe, ex insensili per cutim halitu imminuto, oriri, nemini in dubio esse potest. Salutifera hac excretionem impedita, fluidum, sano corpore, per cutim ejectum, retro, ab extremo corpore, in partes interiores agitur; et intestinorum, praesertim infirma et irritabilia si sint, glandes mucosas nimis stimulando, crebras et mucosas dejectiones efficit ^a.

Nec

^a Vid. Cullen's First Lines, § 1483.

Nec non et *cholera*, quae, ex statu superincumbentis aëris potissimum pendere, videtur, saepe obstructa excitari perspiratione, satis probabile est. Rem ita esse, satis ex eo constat, quod hicce morbus, saepissime, homines, eo anni tempore, invadit, quando, ob coelum frigidum humidumque, insensibilis per cutim halitus magnopere imminuitur^a.

Dyspepsia, quae ad ordinem *Adynamiarum* pertinet, minime quoque raro, a frigore humoreque, quae, corpori simul inexercitato si admoveantur, cuticularem halitum reddunt parciorem, inducitur. Cruditas ventriculi, minuta ciborum appetentia, et vomitus, quae, hoc in morbo, aegrotum molestia afficiunt, ex miro, ventriculum inter et cutim, consensu, pendere videntur. Mirandus hic consensus, plurimum pollere perspicitur, in omnibus fere morbis, qui duas has partes corporis afficiunt. Sydenhamus, in ratione ab eo tradita febris pestiferae et pestilentiae, quae, anno 1665to et sequente, Londini saevierunt funestissimae, narrat; se saepe, neque

^a Vid. § 1459.

que vomitionem sistere, neque aegroti ventriculum ul-
lorum medicaminum tenacem reddere, potuisse; prius-
quam, vasa in extremo corpore firmiora reddendo, et,
eo modo, halitum cuticularem et sudorem iterum cien-
do, pristinum ventriculo vigorem, aliqua ex parte, res-
tituerat ^a.

Ex cuticulari exhalatione impedita vel suppressa,
Dyspnoea quoque, et *Asthmatis* accessiones, oriuntur. Va-
rias inter causas, quae proximum hunc morbum exci-
tent, plane nulla plus pollet, quam nimium sanguinis in
pulmonum vasis accumulatum. Quo autem modo ha-
litus cuticularis imminutio hanc sanguinis accumulatio-
nem producat, supra jam dictum fuit: Quo cognito,
qua ratione Asthma, hac ex causa, oriatur, satis appa-
rebit.

Eadem haec causa, sanguinem nimis tenuem et aquo-
sum reddendo, sed multo magis, vasa corporis laxiora
faciendo debilioraque, aquam inter cutim et afferre, et
jam

^a Vid. Sydenham, sect. 2. chap. 2.

jam praesentem reddere graviolem, pollet. “ Accor-
 “ dingly,” ait Cullenus, “ it is alledged that persons
 “ much exposed to cold and moist air, are liable to
 “ dropfy :” Nam, tali causa agente, ita cuti nocetur, ut
 ad inhalandum humores, quam exhalandum, aptior ac-
 commodatiorque reddatur.

Postremo, insensibilis perspiratio suppressa, *Scorbutum*
 non solum saepe comitatur, sed etiam, haud raro, eum
 praenunciat excitatque. Equidem confitemur, nulla
 forsan exempla extare hominum, qui, ex sola hac causa,
 fuerunt scorbuto correpti; sed tamen permulta nobis
 esse documenta, frigus cum humore conjunctum, et jam
 urgentem morbum graviolem reddere, et eum etiam-
 num quodammodo latentem excitare, omnibus quidem
 concedendum est. “ Denique, retenta diu materia pu-
 “ trescente, vel noxia saltem quae debuisset excerni,
 “ haud absimile est totam massam humorum paulatim
 “ corruptum iri *.”

* Vid. Greg. Conspect. Med. Theor. § 734.